

30 OCT 2000

DR MAHATHIR AKHIRI LAWATAN DUA HARI KE BRUNEI

Oleh: Jackson Sawatan

BANDAR SERI BEGAWAN, 30 Okt (Bernama) -- Perdana Menteri Datuk Seri Dr Mahathir Mohamad hari ini mengakhiri lawatan dua hari ke Brunei dengan beliau mengadakan pertemuan empat mata bersama Sultan Brunei, Sultan Hassanal Bolkiah.

Dr Mahathir dan isteri Datin Seri Dr Siti Hasmah Mohamad Ali yang tiba di sini, tengah hari semalam, berlepas pulang dengan pesawat khas dari Lapangan Terbang Antarabangsa Brunei pada pukul 10 pagi.

Turut berada di lapangan terbang untuk mengucapkan selamat jalan kepada Perdana Menteri dan rombongan ialah Menteri Perusahaan dan Sumber-Sumber Utama Brunei Datuk Seri Setia Awang Haji Abdul Rahman Haji Mohamad Taib yang juga menteri pengiring.

Selain itu, Timbalan Menteri Luar Datuk Leo Michael Toyad serta pegawai-pegawai tinggi kedua-dua negara juga berada di lapangan terbang itu untuk mengucapkan selamat jalan kepada Perdana Menteri.

Semasa lawatan dua hari itu, Perdana Menteri telah mengadakan pertemuan dengan rakyat Malaysia di sini pada tengah hari semalam sebelum menghadiri majlis mengadap di Istana Nurul Iman.

Pertemuan empat mata dengan Sultan Hassanal Bolkiah berlangsung kira-kira sejam malam tadi sebelum Dr Mahathir dan isteri diraikan pada satu majlis santapan malam oleh Sultan Brunei.

-- BERNAMA

JS PR